

Yudas

Yesus el weit kopropa Yudas arye, sekeipsuk yupu

Abuku sekuk deiyoknye bira, el si ara, Yudas ulamuk. Yudas ara, Yesus arye wibuka deibuk mapu, sik 12 nang kan-kan ton kum ulamuk. Anye bira, Yudas Iskariot fia kume. Asurat sekuk Yudas ara, Yesus el weit kopropa ulamuk (Matias 13:55; Markus 6:3). Yudas arye asurat sekuka dopkwetebuk ura, doprobik ninye ara, nun walwale, bukni, sikda Allah diba tenena ninye ulamik.

Yudas ulamuk talak ara, tilila yupu peteren nang weik ulamikce, sikce nyalamik. “Kume, Allah el kanye aryuk bico tenepsiliry, talye lyesulule. Nunce teleb winin ap, mambul fil dona ap deice arye, kum lyesulule. Aning niry deice arye, kum teleb kipdeipdatibye. Dib tenena deice aryuk lyesulul anya arye, akunum lyepsilyop ura, nun kanye tenebibe touk, talye kanye bobuka malye ning ton tuba winiptibye,” nyabuka peterelamik. Aning ara, Allah arye kum tenelamsuka ati, Yakobus arye, asurat sekuk.

Asurat noutamak ara, nyabuk. “Kume. Talya nyaltakana kum bukni, Yesus ati dipkoprop diba tenebibe ura, aminyan talak niry diksukumuk wininamabe. Sik malye uk tuba wininyak ninye ara, akunum lakak upsile. Anang ara, dipkoprop diba kum tenebika ati, winiryuk talima ap, winiryuk kanye tenena ning ap, kum doprobik. Sik talye nyaplobik. Dipkoprop diba tenenyak ninye arye, diksukumuk tuba wininyake,” nyabuka asurat deice arye sekeipsuke.

Yudas arye, “Telebe,” nyana ati, nyabuk yupu

¹Na si ara, Yudas arye, Yakobus el weit koprop arye ayupu sekeipsene. Na ara, nun deiyoknye Yesus Kristus arye talipnuk ura, el fil uk donune. Ayupu sekeipsin nang ara, nun ni Allah wipsukce, bico tenesiliry, nun du Yesus Kristus arye, ‘Malye ning arye malye updeiplyak’ tenen, melibuka kalikisulule. Anggun ti ayupu sekeipsene. ²‘Allah arye wininamsil’ tenen, morosunun ning ara, laka ani nyapnusine. Ara, Allah bico tenepsiliry, yu deilibuk wenena kum arye, ‘El kanye aniryuk melisilyeba, teleb kanye uk bobuka telebuk unamlulum’ tenen, Allah

morosunune. Tonda, ‘Anggun kanye, Allah el nong deice uk deipmunce, yuk nang nirya ati bico tenebuka, melilana uk wininamlulum’ tenen, Allah morosunune. Allah wenena kum arye, talye melisilye ning ap, kanye deibuka unamlulum ap, bico tenebuka melilana uk wininamlulum ap, Allah deice anggun kanye deipnalum ning ap, ‘Aniryra ara, weik upnin banamsil’ tenen, Allah morosunune.

**Sik malye winin nang arye malye winilamak ning ap,
Allah arye aninye opname ning ap ati, nyabuk yupu**

³Na kayapu anggun ti, bico tenesunune. Otalak arye, ‘Anang ati surat seknamne,’ teneamsise. Asurat noutamak ara, Allah lyepsukce, el ap, kanye talima dukdongobuka neika unyap ning ati, ‘Laka nyabuka seknamne,’ teneamsise bukni, yuk nang arye, “Tilila yupu peterena nang anggun kan-kan noutamak yanmake,” nyapmekbuk, kekepsirye, ‘Aning ara, weik mambul anya arye,’ winira utenepne. Ara, ‘Aminyan talak kume, tilila yupu peterena ati, ayupu ara, adip aryuk yupu seknune’ tenen, asurat sekeipmasine.

Winitalak sekmasin yupu deiyok ara, ani. Ara, tilila nang yupu peteresice ura, malye ning yuk tenena deice arye, Allah yupu akunum diba tenemunye ning batakmunye ura, malye upsilyake. Malye upsilyake anya arye, ‘Allah aripsuk yupu uk fia moubuka talibuka unamlulum’ tenen, ayupu sekeipmasine. Allah yupu diba tenebupu ning ara, tonok talak aniryuk Allah arye nun diba tenenyap ninye ati akunum aripsuka ati, yuk talak arye, yuk yupu tonap, kum tabakalinamsile. Akunum aripsuk ninguk diba tenebuka talinamlulume. Yuk yupu tabakuka diba tenena meme.

⁴Anyapmasin ning ara, talye ati kume. Deiyok nyapnusine ara, tilila yupu nyabuka fia malye winin nang duknubuka, anggun kan-kan yanuka unyakce, fia malye winilisyake. Allah yupu laka nyalamik nang, nabi nang arye, amalye winilamice nang atonun nang ara, “Allah arye wenebuka opname,” nyabuka nyalilamik. Atilila yupu peteren nang arye tenenyaka ara, ‘Allah elda talinye. Elda mambul kume,’ tenenyake. Winibuka tenebikirye, Allah yaniplobikirye, fia malye wininyake. Sikce peterenyak ning ara ani. Ara, ‘Nun malye ulamibye bukni, Allah talye urdem aryuk namin kipsiliryne, lyesululnye anya arye, nun talye tenepce fia malye wininamabe. Ara, telebuka. Allah arye kum wenepnamsile,’ tenenyake. Tonda, nun du Yesus Kristus elcuk talisiliryne, nun Weik Deiyoknye usulul bukni, sik tilila nang wininyak ning ap, nyanyak yupu ap, deice arye, “Yesus elda talinye,” nyanyake.

⁵Ura, anyapnusin yupu nirya ara, akunum kekemunce, akunum kel kiplum bukni, tonap tuba, tenepnamluluma ati laka nyapnusine. Allah arye, ‘Na’ tenen, el mapu kiyamuk ninye, Mesir mutuku noutamak ikin

kanye bobuka ulamikbuk, lyebuka dopromuk bukni, aminyan dib kum tenebik ninye ati oltakalamuk. ⁶Tonda, el im deice fil don nang, malaikat ulamikbuk, Allah arye sik ti fil deiyok aribuk ning ara, ‘Nun like’ tenen, sikce yaniplobuka yukak binuka ulamikce, fia malye-malye winilamikba, Allah arye amalaikat nirya wenebuk.

Amalaikat ara, Allah arye dopdakuka, fia kat tapu, kum bulupmanto tapu arye koubuka, fia kuna fumbisik dongobuk. Dongobuk anya arye, amalaikat daulamica ani, sirya talak ninye mutuku-mutuku nirya ati, yupu bokeiplirye wenepnamle talak ara, amalaikat babye, wenebuka oplopnamle. Oplirye, uku dil ban donoklyop ura, uku fia dilibuk, dafia uk deice uk unamake.

⁷Im deice ulamik fil don nang, amalaikat malye-malye winibik touk, Sodom mutuku ap, Gomora mutuku ap, amutuku dana-dana ulamik mutuku ninye ap, aninye nirya arye fia malye winilamik. Sik malye winilamik ara, ani. Sik kanye nong nirya aning uk teneamikce, Allah arye, ‘Sal arye kilapu uk dobuka neika unamake,’ teneamsuk ning atonun kum bukni, aning batakuka sal arye sal mamun dolalamikce yolalamik. Amalye winin ning atonun ning weik ton winilamika ati, Allah im deice arye uku buk dopkwetebuk ura, aninye nirya uku dibuka atonun, aminyan ara, malye winilamice ninye nirya, uku dil ban dopkweteplibuk, uku arye fia dipnamle. ‘Allah arye Sodom mutuku ap, Gomora mutuku ap, winibuka atonun winipnamle ati biknamap’ tenen, nyapne.

⁸Ara, anyapmasin ninye, sikce sik bidamnang ati malye winilalamik atonun, tilila nang anggun kan-kan yayik nang ara, sik malye wininyak ning deice arye, sik nong ati malye kilildanyake. Anang ara, dipkoprop kum elilamik bukni, ‘Yuk nang arye weik nang tenepnamsiyak’ tenen, “Nun eibupu ning, weik mambul ning ani, ani,” nyabuka, ati malye nyabuka nong kum upnamle yupu, talye yupu nyaltakanyake. Winibikirye, ‘Allah ara, nun deiyoknye kum upnamsil’ tenen, el ti, yaniltana uk unyakce, im deice fia teleb ning ati malye nyanyake. Tonda, anang aryuk im deice Allah arye nyapdeiplibuk fil don nang, malaikat nirya ati, malye yupu nyanyake.

⁹Anang arye, ‘Aning mambul,’ tenena kum arye, talye tenepce arye malye yupu nyaltakana uk unyake bukni, malaikat sik weik deiyoknye Mikael arye aning atonun kum winibuk. Mikael ap, Isa Mutuk Domonye ap, Musa dibukak yarikce, Musa nong ati, lildanmarikce, “An doproprulam do, na doproprun do?” nyabuka, yu deice arye nyalanmarika ani, sirya talak ara, Mikael babye, kum erepdayukce malye yupu nyabuka, Isa Mutuku Dongonye ati, “Anda malinye,” kum nyabuka, kum derebuke. Elce, “Nun Deiyoknye Allah elcuk wenepnamkilara,” nyabuk.

¹⁰Mikael babye, kum erepdayukce malye yupu kum nyabuk bukni, atilila nang ara, sik moubuka kum tenenyak ning, kum kel bikik ning nirya ati,

malye yupu nyalinyakce, talya malye yupu nyabuka akutunyake. Ninye ara, Allah arye kanye aripsukbuk, 'Aning ara, malye, aning ara, telebe,' tenebuka kanye bobuka unyap bukni, basam ap, kam ap ara, sik nong noutamak pataplye ninguk talye mankau arye wininyake. Atilila nyanyak nang babye, sik nong pataplye ninguk tenebuka, malye wininyake. Sik kanye bona kum arye, amalye winilamica deice arye sik bidamang ati, malye winililanyake. Winibikeop ura, Allah arye aninye ati, wenebuka oplirye, uku dilamle mutuku dopkweteplye ura, afia unamake.

¹¹ Sik anang ara, fia bicoe, Allah arye anang wenepnamla ati, sik anang ikin upnamle. Sikda Kain arye Allah nyabuk yupu kum kekebukce, malye winibuk touk wininyake. Tonda, minop talak Bileam arye, 'Ayupu ara, tilila yupu,' akunum bikmokcuk, "Yo bok weik aripnukiabe," nyabikura, kekebukce, 'Yo bok weik doproptinye' tenen, patabuka ati, tilila yupu peterebuk. Tilila yupu peterebuk touk, sik anang babye, 'Yo bok weik dolonamap' tenen, malye wininyake. Tonda, minop talak Korah arye, 'Allah arye nyapdeibuk ura, Musa nyalamuk yupu kum kekepnuyap' tenen, deiyok koubuka, el yanibuk touk, sik anang babye, Allah arye nyasulul yupu yaniltanyake.

¹² Sik tilila nang wininyak ning ati, mambul yupu nyapnusine. Anggun dib tenen nang arye, 'Bico tenebuka melilana uk unamabe' tenen, din yubuka neika dilulum talak nirya ara, sik atilila yupu nyan nang ap, ansinibuka bukuka dimunyop ura, ara, fia malye winilulume. Winipmanto ning ara, kurun butum bukni, sung-sunga paliplibuk sukulamle touk, anang arye anggun yuna ara, malye winilisinnyake.

Aning ara, winipmanto ning ara, nyapnusine. Dipkoprop domba wein nang ara, sik domba dina merekuka arinyake. Sik dina atibuk tenelakirye dinyake. Aning atouk, sik tilila yupu nyanyak nang arye, sik yupu kekenyak nang ati, 'Aminyan tam yata wiripnamak do?' tenena kumce, sik bidamnye atibuk tenepdanuka, talye yupu peterenyake.

Tonda, yeinya um mikip arye bopkikuka balamle bukni, mok kum lyilamle atonun, atilila yupu peterena nang ara, sik, nyanyak yupu ara, nong kum upnamle yupu nyanyake. Aning atonunuk yo duk moun li yangalul bukni, ton yo ara duk kum moulule atonun, atilila yupu nyanyak nang babye talye yupu nyanyake.

Sik anang ara, yo kwiniipnamice talak ara, yating ap, nirya kwiniiprobikiba kolulolamle atonun, sik tilila yupu nyanyak nang ara, sik nyanyak yupu ara, teleb yupu nyanyak bukni, nong kum ulule. Bukni sik domba malye ubuka weinyak nang ara, sik domba ati kum tenenyake. Ara, 'Malye winipnuyap do?' tenen, teniltona kum arye, talye tenepce arye neika bukuka dinyaka arye, anggun yuna malye winilisinnyake.

¹³ Ton atilila nang ara, mokceplirye, mek delilyalye talak ara, mek mikip arye lonting-lonting nyalirye, mek wiya ap, yo linglinga ap,

lyabuka erepdoplirye lakak elelamle touk, amalye winin nang sik malye winilamica deice arye, sik fia malye winin ning lakak kililule. Ara sik alye ati laka kum nyapmanto ning unyake. Tonda, anang ara, lukunyan noutamak im deice arye talye-talye balye kurya atonun unyake. Anang wininyak ning deice arye, ‘Dipkoprop teleb bisik ani’ tenen, kum kel biktibye. Allah arye minop talak teneamuk touk, anang dobuka weneplirye, fia kuna bisik kintinipdeibukak dopkwetepnamle. Winiplibuk dafia upnamake.

¹⁴Henok elda, minop talak ulamuk. Adam arye deibuk ura, dadeipdanin, balamika ani, tekbarinye Henok deibik. Allah arye atilila yupu nyanyak nang wenepnamla ati, Henok arye nyalilamuk yupu ani.

“Adilulume, nun Ni Allah ap, ura, Allah arye nyapdeiplibuk el fil im deice donyak nang malaikat ap, yupa fia weik beribu-ribu yanamake. ¹⁵Ara, ninye tukwak ninye nirya ati, ‘Yupu bokeipnamne’ tenen, yanamake. Yupu bokeipnamle talak ara, ‘Allah elda talinye’ tenen, yaniltalamak ninye nirya ara, wenebuka opnamle. Oplirye, uku din mutuku dopkwetepplibuk, dafia unamake.

Ara sik fia malye-malye wininyak nang, Allah tenelye ning fia kum tenenyak nang arye, malye winilamice ning nirya ap, malye yupu nyabuka, Allah el nong deice deililamice yupu nirya ap, ati, anang wenebuka oplopnamle,” nabi Henok arye nyabuk.

(Kejadian 5:4-20; 1 Tawarik 1:1-3)

¹⁶Sik anang ara, lik kanye bobikirye, epra bakirye malye nyabuka yaniltan ninye unyake. Ton anang ara, yuk nang ati dipnilibuka tuba-tuba tilila ati talya kisilinyake. Anang ara, sik kanye talima noutam malye ning patalamlye ninguk tenebuka unyake. ‘Yuk nang arye, sikda teleb nang, tenepnamsiyak’ tenen, sikce, sik badamnye ati erelanyakce kwalin yupu nyalilanyake. Anang ara, dipkoprop yuk nang ati bico tenena kum bukni, ‘Nun patapsilye ning aripnamsiak’ tenen, “Na ka, na ka, anda fia telebnye,” nyabuka talye fil ilitakanyake.

“Anggunce Allah ati, anggun talima ap, nong ap, aripmunce, el yupu talibuka dobolbanlulume,” nyabuk yupu

¹⁷Na kayapu, sik anang arye winilamak bukni, nun Deiyoknye Yesus Kristus arye, ‘Na yupu dobuka mutuku-mutuku nirya peterelbinamak’ tenen, wipdeibuk Rasul nang arye nyalilamik yupu tonap tuba nyapsinyop ura, tenipdelulume. ¹⁸Sik anang arye nyabik yupu ara, ani. “Aminyan sirya talak ara, ngalukuka nalisice nang ara, sik kanye talima noutamak, malye ning pataplye ninguk tenebikirye, ‘Allah elda talinye’ tenen, yaniltanamake. Malye uk wininamake,” nyabuka, sik Rasul nang arye nyalilamsike. ¹⁹Sik anang ara, Allah El Dib Kanye sik nong fum

tam kum ulula anya arye, sik tenebice touk, malye ning wininyake. Awiniyak deice arye nun kanye talima yuk-yuk bokolisinyak arye nun mamun babye, neika kum unyabe.

²⁰Bukni, na kayapu, anggunce Allah el fia diksukum yupu diba tenepmunce, Allah yupu kekena ap, peterena ap, deice arye, anggun talima kwa dipdanuka melilamlulume. Tonda, Allah El Dib Kanye mikip deice arye, Allah morona uk unamlulume. ²¹Allah arye anggun ti, bico tenesulula anya arye anggunce, ‘Allah arye tuba kanye delinamser’ tenen, el ti anggun talima ap, nong ap, aripmunce, el yupu demuk talibuka dobolbanamlulume. Tonda, ‘Dan talak dolyanamsil do?’ tenen, talima kintinibuka dinamlulume. Yesus arye min kum dolyanmasilye talak ara, Allah ati diba tenebuka talipmunce dobolbanamlulume. Nun malye wininyaba ati, nun deiyoknye Yesus Kristus arye, ‘Bitu merekik’ tenen, talye mangkau arye wenepsutu bukni, bico tenepsukce, nun ap, el ap, neika fia kam unamaba ati, dolyanamsile.

²²Sik kanye bokoltolubuk, teniltona uk unyak ninye ati, bico tenebuka sik talima ati melibuka nimalye arye peterenamlyame. Adip aryuk wenebuka batakna kume. ²³Tonda, yuk nang ara, uku dilamle mutuku binmanto ubicop ura, lyebuka dopropmince, tonap tamubuka, Allah el diksukum bisik uk delilyangnamlulume. Winipmanto ning ara, ‘Barye suse talyamlye ninye ongamiyce butum nun kip ninye ongobibyop ura, barye suse dakdongopsilyak’ tenen, kum ongonyabe. Kum ongonyap touk, ton ninye ara, sik malye winin ning fia malye ning anya arye, anang ati bico tenebuka melipnamlulume bukni, ‘Na babye, aning malye winipnilyak’ tenen, ilil-ilil asa arye, anang melibuka unamlulume.

Ayupu sirya dakana ati, Allah si erena ati, nyabuk yupu

²⁴Allah arye anggun nirya ati, ‘Yuk malye bisik bimunyak’ tenen, talibuka balirye, melibuka disululnye ulule. Tonda, Allah arye el mikip arisilirye, el melisilya deice arye, fia daulamibya ani, sirya talak ara, nun nonge dopsilirye, malye ning nirya fia kum kipdeipsilyop ura, el dam ara, fia teleb dirina damak deipsilye ura, kanye deibuka fia telebuk unamabe. ²⁵Nun Ni Allah arye nyapdeibuk ura, Yesus Kristus fil dopsuka deice arye, nun Lyena Deiyoknye^a Allah el tonokuk ulule. Allah yuknye ton kum ulule. El tonokuk ulule. Aning ati ara, el si weik arye erenababe. Allah elda mikip fia weik ulirye, aning-aning nirya Talena Deiyoknye ulule. Elda, fia teleb, dirina weik sisinanye Raja atonun ulule. Aning-

^a 1:25 *Lyena Deiyoknye* – Alkitab noutamak ara, Lyena Deiyoknye sekenyaka ara, ton talak Allah tenen ati sekenyake. Ton talak ara, Yesus tenen ati sekenyake bukni, deiyok ara, Yesus el ining arye kilipsuka deice arye Allah arye lyesulule. Yuda arye Yesus ati sekuk. Tonda, laka nyana yupu nomor 17 dipdelelume.

aning nirya min kweipdeibuk talak arye, aning nirya Talena Deiyoknye ulamuka ani, winitalak tuba ulirye, aminyan yanamle talak nirya babye, fia unamle. Ati, dipkoprop el si uk erebuka unamabe. 'Anirya winipnamle' tenen, "Amin" nyapne.

Telebe, na Yudas arye asukum uk deipne.